

Cartë nabëquë'ë San Pablo parë ra mënë Efesios

Caquë'ë Pablo lu ra naquërelde Efeso

1 Na Pablo por voluntá shtë
Dios nahia tubi poshtë
shtë Jesucristo; bëshel'dë më na.
Caquë'a'a cartë rë' lu të nabëzuné
Dios almë shtë të, lu të naruné
cumplir shti'dzë Jesús, lu të
naquërelde guë'dchi Efeso. ²Gulë
bë'në recibir ra bendición nu gulë
cuedchí ldu'u të por Dios Shtáda'a
nu por Jesucristo, Shláma'a.

Bendición narshe'ldë Jesucristo

³Rdé'na'a alabar Dios, Shtadë
Jesucristo, Shláma'a. Bë'në ldai'
Dios lë'ë hia'a con grë clasë
bendición nananú gube'e purquë
unidë na hia'a con Cristo. ⁴Dios
gulë më lë'ë hia'a juntë con Cristo
ziquë cabësë shtë hia'a. Gulë më
lë'ë hia'a dizdë más antsë cueshtë
guë'dchiliu. Gulë më lë'ë hia'a parë
guëquërel'da'a delantë lu më sin ni
tubi duldë, completamente limpi
parë lë'ë më sin ni tubi demandë
cuntrë lë'ë hia'a. Nu gudili më
lë'ë hia'a parë gac shtu'u hia'a lë'ë
më. ⁵Bë'në më destinar lë'ë hia'a
dizdë antsë parë guëdë'na'a recibir
ziquë shini më por lo quë nabë'në

Jesucristo. Zndë'ë guquin según
guni'i ldu'u Dios de acuerdë con
lo quë narëuu' ldu'u më. ⁶Siemprë
rdé'na'a alabar lë'ë më por ra
favurë ru'bë nabë'në më. Rac shtu'u
më lë'ë hia'a; bë'në ldai' më lë'ë
hia'a; bë'në më të gáca'a unidë con
shini më, Jesucristo, el quë Dios
rac shtú'ui'. ⁷Llëru'bë amor napë
Dios; bë'në më salvar lë'ë hia'a
ndigá por galguti shtë shini më.
Bë'në më perdunë duldë shtë hia'a;
favurë ru'bë ni bë'në më. ⁸Napë më
llëru'bë amor; bëshel'dë më shini
më parë guëne'e më llni, parë tsasé
hia'a nu parë gac bë'a hia'a bien
verdá shtë më. ⁹Nu lë'ë më bëlua'a
më lë'ë hia'a guadë naguni'i ldu'u
më, cusë naná ga'chi antsë, perë
iurne' rac bë'a hia'a purquë zni guc
ldu'u më. ¹⁰Por voluntá shtë më gac
unidë grëtë' ra cusë nananú gube'e
nu tantë ra nananú guë'dchiliu.
Iurë guëga'a iurë gunë më unir ra
cusë ni parë guëribë'a Cristo ziquë
cabësë subrë grë lo quë nabëntsa'u
Dios.

¹¹Por naná hia'a unidë con Cristo
Dios gulë më lë'ë hia'a dizdë antsë
të parë guëdë'na'a recibir tubi partë
narunë tucarë ca'a Cristo; juntë

guédé'na'a recibirin. Grétè' ni na de acuerdè según guni'i ldu'u mè, según voluntá shtë mè dizdè más antsè. ¹²Na hia'a primèrè mènè nagualdí ldu'u shti'dzè mè. Bè'nè mè destinar lè'è hia'a parè gáca'a mènè naquèhunè alabar lè'è mè. Rac shtu'u mè guèní'ia'a llèru'bè na pudèrè shtënè mè. ¹³Nu zac lè'è tè bini tè diza'què; bini tè di'dzè narni'i lla gac salvar tè; gualdí ldu'u tè di'dzè shtë mè. Guc tè unidè con lè'è mè, nu guc tè selladè por Espíritu Santo cumè ziquè shmènè Dios. Pues bè'nè mè prometer guèshe'ldè mè Espíritu Santo parè cueshénúhi' lè'è tè. ¹⁴Lè'è Espíritu Santo na ziquè tubi garantiá de què guène'e mè ra cusè nabè'nè mè prometer; gunè mè librar shmènè mè iurè guèga'a tiempè. Guèlá mè shmènè mè naguzi'i mè. Segurè na ra cusè ni purquè nadápa'a Espíritu Santo. Zni nahin parè gunè mè recibir graci nu labansè shtë mènè.

**Guna'bè Pablo lu Dios
por ra shmènè mè**

¹⁵Rac bé'ahia de què lè'è tè rac shtu'u tè sa' tè nu rialdí ldu'u tè shti'dzè mè; por ni ¹⁶nunquè adè rcuè'zèdia'a rdé'èhia graci lu mè por lè'è tè. Quègna'ba lu mè por lè'è tè, ¹⁷tè Dadè naquèbezè gube'e, lè'è mè naná Shtadè Jesucristo Shláma'a, guèshe'ldè mè Espíritu Santo tè parè gac bè'a tè. Rna'ba lu mè tè guène'e mè másru'u llni guèc tè. Llni shtë mè ze'dè iurè runguè bè'a tè lè'è Jesús. ¹⁸Quègna'ba lu mè guèzianí mè lu shgabè tè, tè parè gac bè'a tè guadè naná dzuléza'a, tubi

esperansè nadápa'a purquè guna'bè mè lè'è hia'a. Quègna'ba lu mè tè gac bè'a tè blac llèru'bè nu blac nasa'a na herenci nanapè ra mènè nabèzuné Dios almè shtë rai'. ¹⁹Nu quègna'ba lu mè tè gac bè'a tè blac llèru'bè na pudèrè shtë mè nadápa'a purquè rialdí ldu'u hia'a shti'dzè mè. Pudèrè ni na mizmè pudèrè nabèlua'a Dios con llèru'bè fuersè iurè bècua'ni mè lè'è Jesús ladi ra tègulè ²⁰nu bècue'zè mè Jesús lugar cula'ni mè, ladè ldi shtë mè lu gube'e. ²¹Bècue'zè mè lè'è Jesús lugar shtë hunurè más guia'a què grè ra autoridá nu gobiernè, más guia'a què grè ra narnibè'a lu gube'e. Bèdè'è mè tubi lè más lasac què grè ra lè la'ni guédchiliu rè' nu más lasac què grè lè nanapè mènè parè tiempè naze'dè. ²²Bèdè'è mè pudèrè lu Jesús tè guènbé'ai' grétè' mènè nu hashtë grè cusè guèa'nè bajo ordè shtë mè, nu bè'nè mè punèrè lè'è Cristo ziquè cabèsè shtë ra grupè shtë shmènè Dios. ²³Pues ra narialdí ldu'i shti'dzè mè, na rai' cuerpè shtë Cristo nu lè'è mè quèbezénúhi' lè'è rai'. Na mè cabèsè shtë shmènè mè guédubi lugar shtë guédchiliu.

Nasalvára'a por amor shtë Dios

2 Dios bène'e mè vidè eternè parè lè'è tè juntè con Cristo; dzè ni todavía lè'è tè na tè ziquè tègulè por causè maldá nu duldè shtënè tè. ²Más antsè guagnaldè tè tèchi ra cusè shtë guédchiliu. Bèzu'bè diaguè tè shti'dzè mèdzabè naná cuesè lu mbè, el què narnibè'a lu nacahi; guanaldè tè tèchi mèdzabè naná lamè shtë ra mènè nanadè rzu'bè

diáguëdi'i shti'dzë më. ³Grétë' hia'a gubánia'a zní más antsë; guanálda'a tēchi deseó mal nananú la'ni ldu'u hia'a; bēdē'na'a cumplir cualquier cusē nabēdchini la'ni shgába'a. Gúca'a mēnē mal. Gúca'a mēnē narunē tucarē cashtigu dushē shtē Dios igual ziquē los de más sa' hia'a. ⁴Perē Dios nalē bēga'a ldu'u mē lē'ē hia'a nu nalē rac shtu'u mē lē'ē hia'a; ⁵bēne'e mē vidē eternē parē lē'ē hia'a por Cristo iurē lē'ē hia'a todavía na hia'a ziquē tēgulē por causē duldē shtēna'a. Na salvar tē por tubi favurē nabē'nē mē, lédēdi'i por cusē za'quē nabē'nē tē. ⁶Dios bēcua'ñi' lē'ē hia'a mizmē tiempē bēdē'ē mē vidē parē Cristo nu bēcue'zē mē lē'ē hia'a con Cristo Jesús lu gube'e. ⁷Bē'nē mē zní tē guēlua'a mē blac llēru'bē na favurē shtē mē parē lē'ē hia'a. Rac shtu'u mē gac bē'a mieti blac llēru'bē amor napē mē. Rac shtu'u mē guēlua'a amor shtēhi' por grē tiempē naze'dē. Nadápa'a amor ni purquē unidē na hia'a con Cristo Jesús. ⁸Por tubsē favurē shtē Dios, nasalvar tē purquē gualdí ldu'u tē shti'dzē mē. Salvaciuni adē zé'dēdi'i por lo que naquēhunē tē sino bēzēlaa'dchi mēhin ndigá. ⁹Ni tubi chu gúnēll gan salvaciuni por lo quē narúnēll, nilē por obrē za'quē. Zní nahin tē adē chu gunē nadchínidi'i delantē lu Dios. ¹⁰Na hia'a lo quē nabēntsa'u Dios. Bēne'e mē vidē eternē parē lē'ē hia'a por Cristo Jesús tē guēdē'na'a cusē za'quē. Zní bē'nē Dios destinar guēdē'na'a dizdē más antsē.

Por Jesucristo cuedchí ldu'u hia'a

¹¹Gulē bēsēagná ldu'u tē de quē antsē adē nádi'i tē mēnē

israelitē. Ra mēnē israelitē rchuguē rall cuerpē shtē rall ziquē custumbrē religiúsē perē lē'ē rall bē'nē rall tratē lē'ē tē ziquē mēnē nalasáquēdi'i purquē adē rchúguēdi'i tē cuerpē shtē shini tē. ¹²Gulē bēsēagná ldu'u tē de quē antsē nídi'i manērē gunguē bē'a tē Cristo purquē zitu na tē parē lē'ē mē. Guc tē ziquē mē zitu parē ra mēnē nagulē Dios. Guc tē ra naguēnēdi'i ra conveñi nabē'nē Dios con mēnē israelitē. Zitu zu tē parē promēsē nabēdē'ē mē lu rai'. Guquērelde tē lu guédchliu rē' perē nunquē nápēdi'i tē esperansē gac salvar tē; guquērelde tē sin Dios iurní. ¹³Perē iurne' unidē na tē con Cristo Jesús. Antsē quēbezē tē zitu parē Dios, perē iurne' por galguti shtē Cristo guabi'guē tē lu Dios. ¹⁴Cristo na narcue'dchí ldu'u hia'a. Bē'nē mē parē gac en paz ra mē israelitē nu ra nanádi'i mē israelitē. Unidē na grétē' hia'a purquē lē'ē mē bēdchisú naná ziquē tubi lu' nabē'nē dividir ra mēnē. ¹⁵Por cuerpē shtē Jesús naguti, bēdē'ē mē fin ra rēglē nu mandamientē shtē lēy tē gac tubsē cuerpē cubi de mēnē israelitē nu ra mēnē nanádi'i mē israelitē. Hia unidē na hia'a; nídi'i divisioni sino nanú paz entrē lē'ē hia'a. ¹⁶Por galguti shtē Jesús lu cruz, bēdē'ē mē fin shtē ra cusē nabē'nē dividir ra mēnē, iurní bēcue'dchí mē ldu'u hia'a. Hia gualú divisioni nu llanē nananú antsē entrē ra mē israelitē nu ra nanádi'i israelitē.

¹⁷Cristo bēdchini nu biadi'dzē mē diza'quē de quē hia gualú divisioni. Por shti'dzē mē bēcuedchí ldu'u

hia'a. Biadi'dzè mè lu tè nazuga'a zitu parè lè'è mè nu zac bēdchini diza'quē ni lu na'a, ra mè israelitē naná allegadē parē lè'è mè. ¹⁸Pues por medio de Cristo grē hia'a, ra mè israelitē nu ra nanádi'i mè israelitē, unidē na hia'a por lè'è Espíritu Santo nu ráca'a guená'ba'a lu Dios por lè'è Espíritu. ¹⁹Por ni lè'è tè mēnē Efeso, hia adē nádi'i tè ziquē mè zitu parē Dios, nilē mēnē nadē guēnédi'i lè'è mè, sino napē tè derechē ziquē los de más shini Dios. Na tè shmēnē Dios. ²⁰Na tè ziquē tubi hiu'u; cimientē shtēhin bēza'a ra poshtë nu ra nabiadi'dzē enseñansē naze'dē de Dios, nu mizmē Jesucristo na partē principal shtë hiu'u. ²¹Por Jesucristo grē partē shtë hiu'u na unidē; cadē tubi partē gudchi'bē shlugári' nu lè'è hiu'u tsagla'guē tsaru'bin ziquē tubi iádu'u nanabani nu nahin santu catē lè'è mè cuézi'. ²²Zni lè'è tè na tè unidē con Cristo con los de más sa' tè naná shmēnē Dios; na tè ziquē tubi hiu'u catē quēreldē Dios purquē cuezēnē Espíritu Santo lè'è tè.

Dios bēshe'ldē Pablo tè guadí'dzi' diza'quē lu ra nanádi'i mè israelitē

3 Por mizmē rsunē rē', na Pablo nanúa prēsi purquē nahia shmēnē Jesús. Bēshe'ldē mè na parē bien shtë tè nanádi'i mēnē israelitē. ²Lluá'ahia de quē bini tè bē'nē mè incarguē diza'quē tè parē guadí'dza lu tè; bini tè bē'nē mè favurē ru'bē parē na, naná nahia poshtë parē ra nanádi'i mè israelitē. ³Dios bēlua'a naná rni'i ldu'u mè lua; guni'i mè lua cusē naná naga'chi

antsē. Riasēhia nu bēquēa'a lu tè con du'pē di'dzē shcuendē ra cusē ni. ⁴Iurē quēu'ldē tè ra di'dzē ni, gac bē'a tè de quē riasēhia lo quē narunē significar galguti shtë Jesús, ⁵tubi secretē naná naga'chi parē ra mēnē naguquēreldē más antsē perē iurne' sí, bēlua'a mè secretē ni lu ra poshtë. Bēlua'a mè ra cusē ni lu ra naruadi'dzē enseñansē naze'dē de Dios; santu na mēnē ni; runē rai' sirvē lu mè. Por Espíritu shtë mè bēlua'a mè secretē ni. ⁶Lè'è secretē ni na zndē'ē; de quē por diza'quē shtë Jesús ra mēnē nanádi'i mè israelitē, gac salvar rall mizmē manērē quē ra mè israelitē nu na rall unidē con Cristo. Iurne' tubsē cuerpē nanú nu bē'nē rall recibir mizmē promēsē naguni'i Dios lu ra mēnē israelitē. Grē mēnē ni unidē na rai' por Cristo.

⁷Sin quē adē rúnēdi'i tucara, guna'bē mè na parē guadí'dza diza'quē. Bē'nē mè favurē nu bēne'e mè pudērē parē guna dchi'ni shtë mè. ⁸Nahia el quē nallasac menos quē grē ra shmēnē Dios perē bē'nē mè favurē tè guadí'dza diza'quē lu ra mēnē nanádi'i mè israelitē tè gac bē'a rall ra cusē za'quē; ni tubi chu gunē gan guēlábēll ra bendición nananú parē ra naná rialdí ldu'i shti'dzē Jesús. ⁹Bēshe'ldē mè na parē guadí'dza lu grētē' mēnē de quē gunē mè salvar ra mēnē nanádi'i mè israelitē. Secretē ni naga'chi dizdē antsē bēcue'shtë Dios guédchiliu, guédchiliu rē' naguctsa'u por pudērē shtë Jesucristo. ¹⁰Guquin tè parē guená grē ra autoridá nu ianglē lu gube'e blac llēru'bē na llni shtë Dios nu

gac bè'a rai' manèrè gunè mè cumplir voluntá shtëhi' por grupè shtë shmènè mè. ¹¹Dios bè'nè cumplir ra cusè ni por medio de Jesucristo, Shláma'a, de acuerdè cumè ziquè guni'i ldu'u mè dizdè principi shtë gué'dchiliu. ¹²Na hia'a unidè con lè'è mè purquè rialdí ldu'u hia'a shti'dzè mè; por ni adè rdzébèdi'ia'a lu Dios sino nápa'a confiansè parè guadi'dzènú hia'a Dios. ¹³Adè guéá'nèdi'i tè tristè por lo què quèhunènú mènè na ndè'è. Mejurè ra cusè ni na tubi bien, tubi hunurè parè lè'è tè.

Amor shtë Cristo

¹⁴Iurè runa llgabè lla na grè ndè'è, rzullibia delantè lu Dadè shtë Jesucristo. ¹⁵Quèhunè Dios tè parè grè ra shmènè mè naquèbezè lu gube'e nu ra naquèrèldè lu gué'dchiliu, gac rall shini mè, tubsè famili shtëhi'. ¹⁶Rna'ba lu Dadè de què guène'e mè llèru'bè bendición, pudèrè, nu fuersè shtë Espíritu Santo la'ni ldu'u tè. Rna'ba lu mè tè gac tè firmè la'ni ldu'u tè con mizmè fuersè shtë Dios. ¹⁷Rna'ba lu mè tè cuezènú Dadè Jesucristo la'ni ldu'u tè. Por fe cuezènú mè lè'è tè. Nu rna'ba lu mè de què nunquè adè rúnèdi'i faltè amor parè sa' tè. Zni gac tè ziquè tubi hiaguè nanapè shlú'chi' catè nanú nisè; gac tè ziquè tubi hui'u nazubè lu cimientè dchi'chi. ¹⁸⁻¹⁹Nu quègna'ba lu mè gac bè'a tè bien con los de más sa' tè nabèzuné Dios almè shtë rai', blac llèru'bè na amor shtë Cristo parè lè'è hia'a. Pues amor shtë mè na más llèru'bè què shgába'a. Nu rna'ba lu mè gunè tè recibir llèru'bè

pudèrè shtë Dios la'ni ldu'u tè, tè gunè tè cumplir voluntá shtë mè.

²⁰Iurne' cha guédè'è hia'a graci lu Dios, el què nanapè pudèrè parè gúni' más cusè ru'bè què lè'è hia'a rná'ba'a, hashtë más què rac runè shgába'a. Quèbezènú pudèrè shtë mè la'ni ldu'u hia'a. ²¹Lè'è tè naná grupè shtë shmènè Dios, gulè bè'nè alabar lè'è Dadè Dios por medio de Jesucristo. Gulè bè'nè alabar lè'è mè hashtë tsalú tiempè catè nídi'i fin. Amén.

Unidè na hia'a por Espíritu Santo

4 Grè ndè'è na verdá; por ni na Pablo, nanúa prèsi purquè nahia shmènè Cristo. Quèhuna ruèguè lu tè de què quèrèldè tè ziquè runè tucarè, ziquè mènè naguna'bè Dios. ²Gulè gac humildè nu gulè gac mè nadu'u. Gulè gac pacènci con sa' tè. Gulè bè'nè perdunè faltè shtë sa'l por amor nanápèl parè lè'i'. ³Gulè guni'i ldu'u parè gac tè unidè por pudèrè shtë Espíritu tè tsúdi'i dishi'bi entrè lè'è tè. ⁴Nanú tubsè cuerpè shtë ra shini Dios nu nanú tubsè Espíritu. Nanú tubsè esperansè nabè'nè tè recibir iurè guna'bè mè lè'è tè. ⁵Nanú tubsè Dadè narnibè'a grè ra shmènè mè. Nanú tubsè ldai' narialdí ldu'u hia'a. Nanú tubsè galèriubè nisè naná sèni na hia'a shmènè mè. ⁶Nanú tubsè Dios naná Dadè shtë grè ra naná rialdí ldu'i shti'dzè mè. Sulè lè'è mè rnibé'ai' lè'è hia'a. Quèhunè dchi'ni mè lè'è hia'a nu cabezènú mè grètè' hia'a.

⁷Bè'nè Cristo favurè parè cadè túbia'a tè guédápa'a don narzèlaa'dchi Espíritu Santo de

acuerdē con voluntá shtë Cristo.

⁸Por ni ra Sagradas Escrituras rni'i:

Be'pi më gube'e; bia'a më
ra nananú bajo ordē shtë
mēdzabē.

Bēzēlaa'dchi më cusē za'quē
parē ra nguui.

⁹Perē ċpēti'i runē cuntienē: "Be'pi
më gube'e"? Runē cuntienē de
quē primērē bietē më hashtë lugar
más guetē shtë guē'dchiliu. ¹⁰El
quē nabietē lu guē'dchiliu na el
mizmə më nabe'pi más guia'a shtë
gube'e tē parē guēnibē'a më; parē
gunē ldai' më grē lugar. ¹¹Bē'nē
më tē gunē shmēnē më recibir
don narzēlaa'dchi Espíritu Santo.
Primērē nanú poshtë; sēbēldá
mēnē na ra narlua'a di'dzē naze'dē
de Dios; stubi mēnē rac rni'i rall
diza'quē parē tsaldí ldu'u mieti;
stubi tantē na ra naquēhapē los
de más sa' rai'; stubi rai' na mēsē
narlua'a los de más sa' rai'. ¹²Zni
bē'nē më punērē ra mēnē ni parē
cadē tubi shini më gac rai' listē
parē dchi'ni shtë më nu parē grē ra
shini më gac rai' firmē lu shnezē
më nu parē tsaru'bē fe shtë rai'
¹³hashtë grētē' hia'a na hia'a unidē
con mizmə fe, hashtë gunguē bē'a
hia'a más lē'ē shini Dios, hashtë
tsaru'bē vidē cubi nabēne'e Cristo
parē cadē túbia'a. Zni gáca'a tubi
mēnē naziaru'bē lu shnezē Dios
hashtë gáca'a mēnē za'quē ziquē na
Cristo. ¹⁴Hia iurní adē chu gáquēdi'i
ziquē tubi llguē'nē naná runē cambi
según rni'i ldú'ull. Hiadē chu nádi'i
ziquē tubi gui'lli nanua'a mbē nezē
rē', nezē rē'. Zni na ra narianaldē
tēchi cualquier enseñansē cubi
naze'dē, ra ldai' narlua'a ra mēsē

con mañi. Ra mēnē ni rguguē rall
sa' rall con bishi. ¹⁵Más bien cha
guēñ'ia'a verdá mientras rac shtu'u
hia'a sa' hia'a. Rqui'ni gáca'a unidē
con Cristo nu rqui'ni tsarú'ba'a más
tē gáca'a ziquē na më. Lē'ē më na
cabēsē shtë hia'a. ¹⁶Por Cristo unidē
na grē partē shtë cuerpē, cadē
partē nali'bi con grē sáhi'. Cadē
partē shtë cuerpē cuesē shlugári'
nu rúni' compañi los de más partē
shtë cuerpē tē gac cumplir lo quē
narunē tucarē; iurní lē'ē cuerpē na
saludē, lédēdi'i rac llú'udi'in. Zni
riaru'bē cuerpē bien nu grē ra partē
shtë cuerpē rac shtu'u rai' sa' rai'.

Vidē cubi nadápa'a por Cristo

¹⁷Pues ndē'ē rnia'a lu tē ziquē
tubi narni'i por mandadē shtë Dadē
Dios; adē quērēldēdi'i tē ziquē ra
mēnē nanadē guēnēdi'i Dios, ra
nanabani de acuerdē con llgabē
nanadē rlluí'di'i. ¹⁸Adē riasēdi'i
rall por nacahi nananú la'ni ldu'u
rall. Nápēdi'i rall vidē narne'e
Dios purquē na rall ziquē ra nadē
rac bē'adi'i por causē naguēdchi
ldu'u rai'. ¹⁹Adē rtúdi'i lu rall iurē
quēhunē rall mal nu bē'nē rall
intriēgu mizmə lē'ē rall lu vici.
Hia nápēdi'i rall rēspēti parē cusē
za'quē sino con gustē quēhunē rall
cumplir grē deseo nananú la'ni
ldu'u rall. ²⁰Perē bēlua'a Cristo lē'ē
tē stubi manērē tē guēquērelde tē
bien. ²¹Rac bē'a tē shti'dzē më; riasē
tē verdá nabēlua'a më. ²²Ziquē
rgu mieti shabē guini, nu nácull
lari limpi, gulē gulú grē cusē mal
nananú la'ni ldu'u tē. Vidē shtë
tē antsē bēsigué lē'ē tē nu más
bēsinin lē'ē tē lu duldē. ²³Mejurē

tsagla'guë gulë gapë llgabë cubi cadë dzë. ²⁴Nu ziquë shabë nacubi, gulë gacu con vidë cubi shtë Dios; bëzëlaa'dchi më vidë ni parë gáquël ziquë Dios, tubi vidë za'quë sin ni tubi duldë.

²⁵Por ni, adë rní'idi'il bishi lu sa' tē. Gulë guni'i verdá lu sa'l purquë grétē' hia'a na hia'a unidë ziquë tubsë cuerpë.

²⁶Si talë rldël, adë rldëdi'il tsa'a dzë. Adë rúnëdi'il duldë. ²⁷Adë rdë'edi'il lugar gunë mëdzabë gan lul.

²⁸El quë nagulaa'në antsë, napë quë guësá'nëll duldë ni nu gúnëll dchi'ni. Gunë nguii ni dchi'ni za'quë parë gápëll centavë tē guëdë'ëll ca'a ra nabënapëdi'i.

²⁹Adë ruadí'dzëdi'il didzabë lu sa' tē sino gulë biadi'dzë cusë za'quë lu sa' tē según nicidá nanapë sa'l tē gápëll más fe. Gulë guni'i di'dzë narsëdchini bendición parë ra narquë diaguë shti'dzël. ³⁰Adë rúnëdi'il niétiquë narsëdchini tristë parë Espíritu Santo shtë Dios purquë por lë'ë Espíritu nacabezënë ldu'u tē, na tē selladë; na tē prupi shmënë Dios hashtë dzë guëdchisú më lë'ë hia'a lu guë'dchiliu nu guia hia'a gube'e.

³¹Gulë bëzalú con grë disgustë nu llanë nu insultë con grë didzabë narni'i tē guëc sa' tē, nu con grë llgabë mal cuntrë sa'l. ³²Gulë guc shtu'u sa'l nu gulë gac tē më pacënci; gulë bë'në perdunë sa'l ziquë bë'në Dios perdunë lë'ël. Bë'në më perdunë lë'ël purquë Cristo rac shtú'ui' lë'ël.

**Lla runë tucarë guëquërelde
shmënë Dios**

5 Por ni gulë guagla'guë ejemplë shtë Dios. Rac shtú'ui'

lë'ë tē ziquë shini më. ²Gulë guc shtu'u sa'l ziquë guc shtu'u Cristo lë'ë hia'a. Bë'në më intriegu mizmë lë'ë më lu galguti por lë'ë hia'a. Gúqui' ziquë tubi lli'li naná guti lu bëcu'guë, tubi ofrendë nabëquitë ldu'u Dios.

³Iurne' lë'ë tē na tē shini Dios; por ni adë chu guëquënë sáhi' nu adë chu tsanáldëdi'i tēchi cusë mal; adë chu guëzëbidi'i ldu'u ra cusë shtë guë'dchiliu. Adë rúnëdi'i tē cusë ni tē parë ni tubi sa' tē guëni'idi'i shcuendë ra cusë rë' entrë lë'ë tē. ⁴Adë ruadí'dzëdi'i tē ra cusë naná runë parë guëtú lul, nilë cusë tuntë, nilë ra cusë dzabë naruadi'dzë mënë, purquë adë rëuu'di'i ldu'u Dios ra cusë ni; sino más bien gulë guni'inú sa'l grë cusë za'quë narunë më parë lë'ë hia'a.

⁵Hia nanë tē ni tubi narquënë ra na'a nu ra na'a narquënë ra nguii, nilë tubi naruadi'dzë didzabë, nilë el quë narzebi ldu'u pë shtë mënë, adë nápëdi'i rall partë catë rnibë'a Cristo, catë Dios na Rëy. Pues el quë narzebi ldu'u ra cusë shtë guë'dchiliu, quëhúnëll duldë idolatría; rúnëll adorar ra cusë material, lëdë Diósëdi'i. ⁶Adë rdë'edi'i tē lugar parë rsiguë sa' tē con di'dzë tuntë purquë ze'dë guëdchini cashtigu shtë Dios guëc ra nanëdi'i guëzu'bë diaguë shti'dzë më. ⁷Por ni adë rápëdi'i tē tratë con ra mënë narunë ra duldë ni.

⁸Antsë lë'ë tē gubani tē lu nacahi; adë guc bé'adi'i tē shti'dzë më perë iurne' bë'në tē recibir llni shtë Dadë Dios. Gulë guquërelde ziquë mënë nanapë llni shtë më la'ni ldu'u tē.

⁹Lë'ë llni rsëdchini cusë za'quë

nu verdá nu tubi vidë naná tubldí.

¹⁰Gulë guni'i ldu'u të tsanaldë të tëchi ra cusë narsëquitë ldu'u Dios.

¹¹Adë gápëdi'i të partë con ra cusë nanadë rlluf'idi'i, ra cusë narunë mënë lu nacahi. Más bien gulë gudildi ra mënë narunë duldë ni.

¹²Rtu lu hia'a guëní'ia'a shcuendë ra cusë mal naquëhunë mënë lu nacahi. ¹³Pues iurë grë ra cusë rë' cuezin lu llni, iurní rlua'a bien clarë lla nahin. Llni rzianí guëc grëtë' ra cusë ni. Llni shtë Dios napë pudërë pare gac cambi nguii mal të gáqui' ziquë llni. ¹⁴Por ni rni'i Sagradas Escrituras:

Gulë guëtëtsë mbëca'ldë lu të, lë'lë të nanaga'si.

Gulë bër'u'u ladi ra mënë naquërelde lu nacahi, nu Cristo guëzianí la'ni ldu'u të.

¹⁵Por ni gulë guná bien mudë nanabani të, lédëdi'i ziquë mënë nanadë guënëdi'i Dios, sino ziquë mënë nariasé shti'dzë më. ¹⁶Gulë bënë cumplir cusë za'quë mientras nabani të purquë iurne' nalë duldë quëhunë mënë. ¹⁷Adë gac të ziquë mënë tuntë naná guënëdi'i, sino gulë gac të mënë narac bē'a voluntá shtë Dios. ¹⁸Adë rzuu'dchidi'i të purquë galëzudchi gua'a lē'lē të gabildi. Mejurë gulë bēdē'lē permisi guëni'bē'a Espíritu Santo guëdubi vidë shtënl. ¹⁹Gulë biadi'dzë lu los de más sa'l con Salmo nu cantë nu labansë nananú la'ni ldu'u të. Gulë bi'ldi; gulë bē'nē alabar lē'lē Dios con guëdubínú ldu'u të. ²⁰Gulë bēdē'lē graci lu Dadë Dios siempre por grë cusë. Gulë bēdē'lē graci lu më en el nombre shtë Jesucristo, Shlāma'a.

Vidë shtë naná cristiano

²¹Gulë gac të muzë parë los de más sa'l. Zni quëhúnēl honrar Dadë Jesucristo.

²²Lē'lē të na'a naná casadë, gulë bē'nē rēspēti tsé'lēl ziquë quëhúnēl rēspēti Dadë Jesús ²³purquë lē'lē nguii na ziquë cabēsë shtë tsé'li', ziquë Cristo na cabēsë shtë grupë shtë shmënë Dios. Cristo na më salvador shtë shmënë më nu lē'lē rai' na ziquë tubi cuerpë parë lē'lē më. ²⁴Ziquë ra shmënë Dios napë rall rēspēti parë Cristo nu rzu'bē diaguë rai' shti'dzë më, zni runë tucarë ra tse'lē nguii gapë rai' rēspēti lu tse'lē rai'.

²⁵Lē'lē të nguii casadë, napë quë gac shtu'u të tsé'lēl igual manērë ziquë Cristo gac shtu'u më shmënë më nu bēdē'lē më vidë shtënl më por lē'lē mënë ni. ²⁶Zni bē'nē më parë gac ra mënë ni sin duldë, parë guëzunē më almë shtë rai' por shti'dzë më naná ziquë galëriubë nisē. ²⁷Guti më por ra shmënë më të gunë më presentar lē'lē rai' delantē mizmē lē'lē më ziquë tubi lliguēna'a naná parë guëtse'ái', nasa'a, limpi, sin ni tubi manchē, ni tubi bēshudi, bien hecho, nu gáqui' sulë parë tsé'li'. Cagnia'a shcuendë grupë shtë shmënë Dios. ²⁸Zni runë tucarë ra nguii gac shtu'u rall tse'lē rall, igual ziquë rac shtú'ull mizmē lē'lēl. El quë narac shtu'u tsé'li' de verdá, ni rac shtu'u el mizmē lē'i'. ²⁹Pues ni tubi de lē'lē hia'a rna tushē mizmē lē'lē hia'a, sino quë rdé'na'a alimentar shcuérpa'a nu quëhápa'a mizmē lē'lē hia'a. Pues Cristo quëhunë më lo mizmē con

shmënë më ³⁰ naná ziquë cuerpë shtëi'. Na hia'a partë shtë cuerpë shtëne më. ³¹Naescritë: "Por ni l'ë nguui guësëa'në ra shtadë nguui të parë guëtsé'ai' tsé'li'; hia guërupë rai' na rai' tubsë". ³²Ni na tubi secretë ru'bë, perë cagnia'a lu të comparaciuni rë' quëhunë tratë shcuendë Cristo con grupë shtë shmënë Dios. ³³Perë comparaciuni rë' también runë cuntienë de quë cadë tubi nguui napë quë gac shtú'ui' tsé'li' igual ziquë rac shtú'ull mizme lé'ëll, nu runë tucarë ra na'a gunë rai' rëspëti ra tsé'li'.

6 Lë'ë të liguë'në, gulë bëzu'bë diaguë shti'dzë shtádëll, purquë zni runë tucarë gunë të ziquë shini Dios. Tubldí nahin delantë lu Dios. ²Lúniquë mandamientë shtë Dios nanapë promësë, rni'i zndë'lë: "Gulë bë'në rëspëti shtádëll nu shn'al të parë guëquitë ldú'ul ³nu guëbánil zihani izë lu guédchiliu".

⁴Lë'ë të nanapë shínil, adë rúnëdi'il tratë mal con shínil parë quë adë guëldéd'i' shínil; más bien gulë guni'inú lë'ë rall; gulë bédë'ë cunseju za'quë të parë adë guërú'udi'i rall shnezë Dios.

⁵Lë'ë të naná muzë, gulë bëzu'bë diaguë shti'dzë shlámël lu guédchiliu rë'. Gulë gapë rëspëti parë lë'ë rai' nu gulë gac të mënë obedientë ziquë si fuërë quëhunë të sirvë lu Cristo.

⁶Gulë bë'në sirvë bien lu rai' guëdubi tiempë, lëdë niá'sed'i' iurë rna rai' lu të, të parë guëa'në të bien con lë'ë rai' si fuërë quëhunë të sirvë lu Jesucristo. Gulë bë'në

sirvë con guëdubinú ldu'u të purquë zni rac shtu'u Dios gunë të. ⁷Gulë bë'në dchi'ni con guëdubinú ldu'u të con lëgrë la'ni ldu'u të purquë zni rac shtu'u Dios. Adë rúnëdi'i të llgabë sulamëntë lu mënë quëhunë të sirvë. ⁸Pues nanë të cadë túbia'a, ra muzë nu ra lamë, guëdéd'na'a recibir según cusë za'quë u cusë mal naquëdéd'na'a. Lë'ë Dadë guëne'e narunë tucarë cadë túbia'a.

⁹Lë'ë të lamë, quëgnia'a lu të iurne'; gulë bë'në tratë bien con ra muzë. Gulë gac më nadu'u lu ra muzë shtëne të; adë rushtiádi'i të guëc rall. Gulë bësëagná ldu'u të napë të tubsë lamë lu gube'e. Lë'ë Dadë quëhunë më igual con grë mieti, ra naná runë dchi'ni nu ra naná rnibë'a.

Nadápa'a fuersë shtë Dios parë guëdéd'na'a gan lu grë enemigu

¹⁰Iurne' bëchi, gulë su firmë lu shnezë Dios. Na të unidë con lë'ë më nu rdë'ë më fuersë ru'bë parë lë'ë të. ¹¹Gulë bédë'ë sí parë guëgacu Dios lë'ë të ziquë suldadë nanua'a gui'bë të parë gac të firmë cuntrë grëtë' cusë naná guëguguë mēdzabë, ¹²purquë adë quëd'ldidi'ia'a con mënë; adë nádi'i enemigu shtëna'a ziquë mënë shtë guédchiliu sino enemigu shtëna'a na ra fuersë mal; adë chu rnádi'i lúhi'. Quiere decir, ra autoridá, ra narnibë'a lu nacahi, ra zihani espíritu mal nanapë más pudërë quë lë'ë hia'a. ¹³Por ni gulë bë'në recibir grë fuersë narne'e Dios parë lë'ë hia'a të guëdéd'na'a gan lu grë cusë mal naze'denú mēdzabë lu hia'a, perë despuësë de tēdë

grë prëbë, todavía zu të firmë lu shnezë më. ¹⁴Gulë gac firmë iurne' con verdá cumë ziquë tubi nalli'i la'ni. Gulë gubani tubi vidë tubldí delantë lu Dios; nahin ziquë vestidë narunë defender ldu'u suldadë. ¹⁵Gulë bë'në preparar bien parë guëni'inú të mënë diza'quë narsëdchini paz entrë Dios nu mënë. Gulë bë'nin ziquë suldadë narunë preparar iurë quëquë'ëll sabádu. ¹⁶Perë subrë de ni, gulë gualdí ldu'u të shti'dzë më. Fe shtë të na ziquë defensë nanua'a suldadë. Fe gunë gan guësëaldë grë ra tentación shtë mëdzabë; na rahin ziquë flechë nanua'a gui'i. ¹⁷Gulë gac të segurë nasalvar të. Na ziquë tubi cascu gui'bë naná canihapë guëc suldadë, nu gulë guna'zi spadë shtë Espíritu Santo. Spadë ni na shti'dzë Dios. ¹⁸Gulë bë'në cumplir cunseju rë' mientras quëgna'bë të lu Dios. Gulë bë'në ruëguë lu Dios lo quë narac shtu'u Espíritu Santo. Nu gulë gac nasini nu listë sin quë adë chu guëazë guëtëdi'i. Nu gulë bë'në ruëguë lu më por grë ra shmënë më. ¹⁹Nu gulë bë'në ruëguë

lu më por na të parë guëne'eru'u më más llni nu valurë të iurë guëni'inhia ra mënë, gac bë'a rall diza'quë de quë nahin parë mënë narëta' guëdubi guë'dchiliu. ²⁰Dios bëshe'ldë më na; por ni nanúa prësi iurne'. Gulë guna'bë lu më të parë tsagla'guë guëni'ihia diza'quë. Zni runë tucarë guëni'ihia sin quë adë rdzëbëdia'a.

Rialú cartë con saludë

²¹Tíquico lë'ë bëchi narac shtu'u hia'a, nu quëhúnëll cumplir dchi'ni shtë Dadë; lë'i' guadí'dzi' lu të grëtë' lo quë naguzaca, nu lla quërela. ²²Quëgshe'lda lë'i' lu të, të parë gac bë'a të lla na shcuendë na'a ndë'ë nu parë guëni'inúhi' lë'ë të gac të más firmë lu shnezë Dios.

²³Rna'ba de quë Dios Shtëda'a nu lë'ë Jesucristo, Shláma'a, gúni' parë cuedchí ldu'u të nu parë gac shtu'u të sa' të nu tsaldí ldu'u të di'dzë shtë më. ²⁴Nu rna'ba lu më gunë ldai' më lë'ë të, grëtë' narac shtu'u lë'ë Dadë Jesucristo de verdá. Amén.